

Referencia para *Ni chigaca lu reunión* *Xhiiña' Dios ne modo nabánu*

6-12 DE ENERO

CA TESORO ZEEDA LU BIBLIA | GÉNE- SIS 1, 2

«Guluu Jehová guendanabani ndaani' Guidxilayú»

w11 15/2 yaza 8 párr. 10

Espíritu santu gucané para guyá' guirá' xixé ni nuu

¹⁰ Biblia ruzeete' bizulú bi'ni' Dios dxiiña' lu caa-dxi dxi ra biza'be stale cosa, peru cadi ti dxi de veinticuatro hora caní, sínuque gúcacani dxi de stale tiempu. Lu primé dxi que bisihuinni Jibá ti xtuxhu biaani' lu Guidxilayú ri'. Zacá bizulú bí'nibe caadxi cosa ni bihuinni despué, dxi ma' gunda bihuinni Gubidxa ne Beeu dede lu Guidxilayú ri' (Gén. 1:3, 14). Lu guiropa dxi que bizulú biza'be ti capahuini' ni nuu guidubi naca Guidxilayú ne rábicabe ni atmósfera (Gén. 1:6). Pur nga gunda guyuu nisa, biaani' ne bi lu Guidxilayú, peru qué rihuinni ra nabidxi. Ra bizulú guionna gubidxa que, biquiñe' Jibá espíritu sti' para bizá' ca continente ca. Ximodo bí'nibe ni ya'. Zándaca laaca stipa sti' Guidxilayú ca nga biquiñebe para guleebe ni de ndaani' nisa ni nexhe' luni, zacá ma' gunda bihuinni ra nabidxi (Gén. 1:9). Cásica dxi que ne xcaadxi dxi ni gudí'di', bí'nibe xcaadxi cosa naro'ba'.

it-1 yaza 571 párr. 8, 9 ne yaza 572 párr. 1, 2 Ni guyá'

Laaca risaca guzé'tenu qué niquiñe' verbo hebreu *ba-rá'* lu Génesis 1:16, ni raca significar «guzá'», sínuque biquiñe' verbo hebreu *'a-sáh*, ni raca significar «guni». Ora riete lu Génesis 1:1 de «guibá'» la? maca né Gubidxa, Beeu ne beleguí nga nuu luni, nga runi zanda guininu maca nuu guirá' ni dede ante guizaa Guidapa Dxi que. «Dxi» ri' nga gudixhe chaahui' Dios guirá' cosa

nuu guibá' para guihuinnica' lu Guidxilayú. Ca diidxa': «Bisaanabe guirá' ni lu espaciú para guzaanicaní lu guidxilayú», rusihuinni dxi ca nga bizulú bihuinni guirá' ni dede lu Guidxilayú, casi ñaca nuucani lu ti espaciú. Laaca biquiñe' guirá' ni casi «ti señal para estación, para dxi ne para iza», ndi' raca significar zanda iquiñe' biní ni casi guía (Gé 1:14).

Ra bizaa Gaayu' Dxi que bizá' Dios cosa nabani. Qué niguixhe Dios ñaca evolucionar ca cosa nabani de ti cosa si, sínuque pur poder stibe guyuu stale mani'. Biblia ná: «Ne bizulú bizá' Dios mani' naro'ba' ni nuu ndaani' nisadó' ne guirá' ni nabani ni riniibi ne ni ridale ndaani' nisa, ne guirá' mani' ni napa xhaa ni ripapa de cada clase sti'». Biiya' si Dios guizá' galán guirá' ni, guluu ndaaya' ni ne guni' guidale ni, ne zanda gaca ndi' purti' biza'be guirá' clase mani' para guidáleca' según clase stica' (Gé 1:20-23).

Ra bizaa Xhoopa' Dxi que «bizulú bizá' Dios mani' guí'xhi' de cada clase sti' lu guidxilayú, ne mani' nadó' de cada clase sti' ne mani' ni rixubi ndaani' layú de cada clase sti'». Guizá' guyuula'dxi' Dios ni bizá' dxi ri' cásica guirá' ni bizá' ante (Gé 1:24, 25).

Ra ma' ziluxe Xhoopa' Dxi de cuzá' Dios guirá' cosa, bizá' hombre casi laa, jma risaca que ca mani' peru menu risaca que ca ángel. Neca Génesis 1:27 ruzeete' bizá' Dios binni, «hombre ne gunaa biza'be laaca'», peru lu relatu sti' Génesis 2:7-9 cusiene gucuua Jehová yu para bizá' hombre, bichabe bi de guendanabani ra xii ne beeda gaca hombre que ti alma ni nabani ndaani' ti paraísu ra nuu stale guendaró para laa. Biquiñe' Jehová Dios cosa nuu lu Guidxilayú ni bizá' para bizá' ti hombre ne para biza'be gunaa la? biquiñebe ti custiá sti' Adán (Gé 2:18-25). Ra biza'be gunaa, raqué nga guyuu stobi casi hombre (Gé 5:1, 2).

Guyúbinu ca perla ni ga'chi'

w15 1/6 yaza 5

Xi huayuni ciencia pur binni

Panda iza napa universo ne Guidxilayú

Rini' ca científicu napa Guidxilayú ri' bia' 4,000 millón de iza ne bizulú universo ri' raca bia' 13,000 o 14,000 millón de iza. Qué riní' dī' Biblia padxipe' guyá' universo. Laaca qué ruzeeteni pa chupa chonna mil iza si nga napa Guidxilayú ri'. Sicarí' na primé versículo zeeda lu Biblia: «Primé que Dios bizá' guibá' ne guidxilayú» (Génesis 1:1). Racané ni bizé'tenu ri' ca científicu para ganda cueeca' cuenta ne gánaca' panda iza napa universo ne Guidxilayú ora riquiineca' ley ne principiu ni nuu para laani.

it-2 yaza 80

Jesucristu

Qué nuza'be cosa. Neca gucané Jesús para guyá' ca cosa ni bizá' Dios, peru cadī laadibe biza'be guirá' ni, sínuque Bixhózebe. Pur stīpa stī' Dios o espíritu santu stī' nga gunda guyá' guirá' cosa ni nuu (Gé 1:2; Sl 33:6). Ne cumu ra nuu Jehová nga cadá guendanabani la? nga runi caquiiñe' gusisaca guirá' ni guyá' laabe, ni rihuinni ne ni qué rihuinni (Sl 36:9). Qué nuzá' dī' Jesús cosa, peru biquiine' Jehová laabe para ganda guzá' ca cosa nuu. Ne Jesús pe' guní' Jehová nga bizá' guirá' cosa nuu, cásica ruzeete' Stiidxa' Dios ni (Mt 19:4-6; laaca zanda gú'yalu' CREA-CIÓN).

13-19 DE ENERO

CA TESORO ZEEDA LU BIBLIA | GÉNESIS 3-5

«Ca consecuencia ni bedané primé guendarusiguii»

w17.02 yaza 5 párr. 9

Dxandí' zaca canī ma' gudixhe ique Dios guni

⁹ Biquiine' Binidxaba' ti beenda' para quite' Eva ti gucheené Jobá, Bixhoze. Biblia ná: «Guca beenda' que maní' ni jma nexhená lade gui-

rá' maní' guí'xhi' bizá' Jobá Dios. Ngue runi, gúdxime gunaa que: “Ñee dxandí' gudxi Dios laatu cadī naquiiñe' goto cuananaxhi stī' guirá' yaga nuu ndaaní' jardín ri' la?”. Óraque na gunaa que rabi beenda' que: “Zanda guidódo cuananaxhi stī' ca yaga nuu ndaaní' jardín ri'. Peru cuananaxhi stī' yaga zuhuaa galahui' jardín ca la? ma' guní' Dios: «Cadi naquiiñe' goto cuananaxhi stini, co', cadī cánatu ni ti cadī gá-titu». Beenda' que bicabi gunaa que: “Dxandipe' qué zátitu. Purti' nanna Dios zaxele' lutu dxi goto cuananaxhi stini ne zácatu casi Dios ne zánnatu xii nga jneza ne ni cadī jneza»» (**Génesis 3:1-5; Apocalipsis 12:9**). Biyúbibe modo guihuinni malu Dios purti' cadī cudī lugar gó ca xiiñi' ni nuu lu Guidxilayú guirá' «cuananaxhi stī' ca yaga nuu ndaaní' jardín». Casi ora niní'be «Ximodo ndí' qué zanda gúñitu ni racalá'dxitu». De raqué bisiguiibe Eva ora gúdxibe laa: «Dxandipe' qué zátitu». Despué gucalá'dxi-be nucaabe laa niní' ique cadī caquiiñe' guzuuba' stiidxa' Dios. Gúdxibe laa: «Purti' nanna Dios zaxele' lutu dxi goto cuananaxhi stini». Ne ca diidxa' ri', guní' Binidxaba' qué ná' Jobá gó Adán ne Eva cuananaxhi que purti' pa gúñicabe ni, zánnacabe xiixa nabé risaca. Ne último la? bisi-guii Binidxaba' ora guní': «Zácatu casi Dios ne zánnatu xii nga jneza ne ni cadī jneza».

w00 15/11 yaza 25, 26

¿Xi zanda guizí'dinu de primé pareja bibani lu Guidxilayú?

¿Ñee dxandí' nga qué ñanda nucaaná' Eva peca-du que la? Co'. Guní' ique lii nga Eva. Ni gudxi beenda' que laabe ma' gadxé ni de ni gudxi Dios ne Adán laabe. ¿Ximodo ñuni sentirlu' pa ñabi ti binni ni qué runibia'lu' cusiguii tobi de ca familia stīlu' lii? Cadi dxandí' nidxiichilu' ne ma' qué nu-caadiágalu' laabe la? Nga ca nga naquiiñe' ñuni Eva. ¿Tuu nga beenda' que para guiní' cadī jneza ni ná Dios ne ni ná xheelabe ya? Naquiiñe' ninanda Eva orden gudixhe Dios para guenda-xheela' ne ante nicaabe xiixa decisión primeru naquiiñe' niní'nebe Adán. Zacaca naquiiñe' gúñi-

nu ora chu' tu gabi laanu xiixa cosa gadxé de ni cá lu Biblia. Peru Eva bi'ni' cré ni gudxi beenda' que laa ne stubi si guní' íque xii nga ni jneza ne ni cadi jneza. Cumu gucuá íquebe ni la? guyuulá'dxibe ni caní' beenda' que. Cadi jneza ngue ni bi'ni' Eva, purti' qué nibeebe deseú que ndaani' ladxido'be o ñábibe ni xheelabe purti' laa nga xaíque stibe (1 Corintios 11:3; Santiago 1:14, 15).

Bi'ni' Adán ni ná xheela'

Qué nindaa bicaa Eva Adán guchee. ¿Xiñee nagueenda bi'ni' cré Adán ni gudxi xheela' laa ya? (Génesis 3:6, 17). Guca nagana para Adán ganna tu pe' nga naquiiñe' guni ni ná ¿ñee zuzuubabe stiidxa' Dios ni bizá' laabe ne bidii laabe guirá' ni dede bidii laabe xheelabe, Eva la? ¿Ñee ziebe ra nuu Bixhózebe para gabi laabe xi naquiiñe' gúnibe la? o zúnibe ni bi'ni' xheelabe. Nanna Adán cadi dxandí' dí' zaca ni guní' Binidxaba' pa gócabé cuananaxhi que. Apóstol Pablo bicaa: «Ne cadi Adán dí' nga bisiguii Binidxaba', sínuque Eva, ne laa nga bi'ni' pecar» (1 Timoteo 2:14). Racá ridú'yanu, Adán pe' qué niná nuzuuba' stiidxa' Jehová. Rulu' si jma bidixibi Adán nixele' de xheela' qué ñapa confianza zanda guni chaahui' Dios ni bizaaca que.

w12 1/9 yaza 4 párr. 2

¿Ñee rusisaca Dios gunaa la?

¿Ñee bi'ni' maldecir Dios gunaa la?

Co'. Ni bi'ni' maldecir Jehová Dios nga «beenda' yooxho' ni lá' Diablu» (Apocalipsis 12:9; Génesis 3:14). Ora guní' Jehová zuni dominar Adán xheela', cadi cudiibe derechu laa guquiichiná' laabe (Génesis 3:16). Ni caní' Jehová nga xii consecuencia zápacabe pur pecadu stícabe.

w04 1/1 yaza 29 párr. 2

Ca ni naquiiñe' gánnanu de libru sti' Génesis (primé ndaa)

3:17. ¿Ximodo nga guca maldecir layú ne pa-biá' tiempu bindaa ni?

Guizá' nagana guca para binni guni dxiiña' lu layú dxi guca maldecir ni. Biya' ca xiiñi' Adán

zacá ni ora gundani yaga guichi ne yaga gui'xhi' lu layú, ngue runi Lamec, bixhoze Noé, guní': «Dxiíña' naná ni rúninu né nanu lu layú ni qué gapa ndaaya' sti' Jehová» (Génesis 5:29). Despué de Diluvio que guluu Jehová ndaaya' Noé ne ca xiiñi' ne gúdxibe laaca' racalá'dxibe gápaca' xiiñica' (Génesis 9:1). Zándaca rarí' nga bixhiá Dios maldición sti' layú que (Génesis 13:10).

it-1 yaza 717

Yuuba' rapa gunaa ante gapa ba'du'

Yuuba' rapa gunaa ante gapa ba'du' ne ora ma' cayapa ba'du'. Despué de bichee Eva, primé gunaa que, gudxi Dios laa zapa yuuba' ora ma' cayapa ba'du'. Pa ñaca nuzuuba' Eva diidxa', siempre ñápabe ndaaya' sti' Dios ne ñéchebe ora chigápabe ba'du' purti' «ndaaya' sti' Jehová nga ni runi binni ricu, ne qué redané ni yuuba'» (Pr 10:22). Peru cumu bicheebe la? ma' cadi perfectu dí' cuerpu stibe ngue runi zuni sentirbe yuuba' ora ma' cayápabe ba'du'. Nga runi Dios guní': «Zutale' ca sufrimientu stilu' ora gacaxiiñilu' ne zápalu' xiiñilu' né yuuba'», (ora guní' Dios ca diidxa' ri' casi ñaca niní' laa cudii lugar gaca ni) (Gé 3:16).

Guyúbinu ca perla ni ga'chi'

it-2 yaza 183 párr. 2

Lamec

Poema gudixhe Lamec para ca xheela' (Gé 4:23, 24) bisihuinni ni malu guca binni dxiqué. Sicarí' ná ni: «Lagucaadiaga naa, ca xheela' Lamec. Lagucaadiaga ni chitidxe' laatu: biite' ti hombre ni bi'ni' herir naa, ya, biite' ti joven ni bidii ti golpe naa. Pa gadxe biaje caquiiñe' gaca vengárcabe de binni ni guuti Caín, binni ni guuti Lamec naquiiñe' gaca vengárcabe de laa setenta y siete biaje». Zándaca ora gudixhe Lamec poema ri', caní'be guca defenderbe ne cadi laapebe gudi-xhe íquebe guutibe hombre que casi bi'ni' Caín, purti' cayaca defenderbe ora biitibe hombre ni caguu golpe laabe ne ni bi'ni' herir laabe. Nga runi, né poema gudíxhebe que canábabe binni

cadi gaca vengar de laabe purti' biitibe hombre ni cucaalú laabe.

it-1 yaza 359

Blasfemia

Bizulú biquiñecabe lá Jehová tiempu bibani Enós, ante gueda Diluvio que, peru cadi jneza modo bíñicabe ni purti' maca dede ante guní' Abel lá Dios ora guní'ne laabe (Gé 4:26; Heb 11:4). Nuu caadxi hombre ni runi estudiar naca' pa cadi jneza modo biquiñecabe lá Jehová ne pa biquiñecabe ni para tuuxa binni o ti bidó' la? zanda guininu naca ni ti blasfemia (laaca zanda gúyalu' ENÓS).

20-26 DE ENERO

CA TESORO ZEEDA LU BIBLIA | GÉNESIS 6-8

«Bí'nibe cani zaqué zaqué pe'»

w18.02 yaza 4 párr. 4

Guzú'banu diidxa' ne gápanu fe cásica gupa Noé, Daniel ne Job

4 Ca guendanagana ni bidxaagalube. Ca dxi bibani Enoc, bisabuelo sti' Noé, ca binni que nuuca' zitu de Dios. Dede «uluu dí ca» Jíobá (Jud. 14, 15). Ze' dxi jma bidale guendaridinde. Ne para tiempu bibani Noé ma' «bidxá tipa guidxilayú ri' de guendaridinde». Caadxi ángel malu gúcaca' casi binni guidxilayú, bichaganaca' caadxi gunaa ne gúpaca' xiiñica', malu guca ca xiiñica' ne guizá' bininaca' binni (Gén. 6:2-4, 11, 12). Peru gadxepe' guca Noé. Biblia ná «guyuu-lá'dxi' Jíobá» guirá' ni bí'nibe ne «bisihuínnibe qué gápabe donda lade caní bibaninebe». Ne guzanebe «Dios ni dxandí'» (Gén. 6:8, 9).

w13 1/4 yaza 14 párr. 1

Guzanebe Dios ni dxandí'

Gudi'dí' stale iza para biluxe Noé arca que, zándaca cuarenta o cincuenta iza. Gupa xidé bisábabe stale yaga, guxubiyube caní ne bigabe caní para gúnibe caní muriu, tabla, ne xcaadxi

cosa. Ne despué biquiidibe caní. Arca que naquiiñe' gácani de chonna pisu, gápani cuarto huiini' ne ti puerta'. Ne zándaca ora quiba' ique ni la? naquiiñe' gaca xcaadxi nasoo galaa ni ti ganda guxooñe' nisa guiropa' ladu ne gápani ventana guidubi ruaani luguia' (Génesis 6:14-16).

w11 15/9 yaza 18 párr. 13

Guxó'ñenu lu neza sti' Jíobá sin guidxáganu

¹³ Apóstol que bizeete' gupa ca xpinni Jíobá ti guenda ni gucané laaca' para guxooñeca' ne guni ganarca'. Tobi de ca binni ni bisihuinni guenda ca nga Noé, guidú'yanu ximodo bí'nibe ni **(biinda' Hebreos 11:7)**. Gudxi Jíobá laabe ziaba «ti nisaguié naro'ba' lu guidxilayú para gunitilú guirá'» caní nabani luni (Gén. 6:17). Xiñee guní' Pablu «ca'ru gu'ya be ni» ya'. Purti' qué huayuu dxi guinitilú binni zaqué. Peru neca qué huayaca ni o nagana para gácani la? bí'ni' cré Noé dxandí' zácani. Ne bí'ni' crebe ni purti' gúpabe fe. Bí'ni' crebe zuni Jíobá ni ma' guní', ngue runi, qué niní' íquebe nagana caní canaba' Dios laabe gúnibe. Biblia na bí'nibe ni bí'ni' mandar Dios laabe, «bí'nibe zaqué zaquepe'» (Gén. 6:22). Ne naro'ba' dxiiña' ngue gucuaabe, purti' napa xidé guza'be ti arca, uguube guendaró para laabe ne uguube guixi para ca maní' que, gutagulisaabe ca maní' que, quixhenabe binni de ni chiguizaaca ne gacanebe binnilídxibe gapa fe Jíobá. Pur fe ni gupa Noé ne modo bí'ni' huantar guleendú ni galán, purti' bilabe ne bilá ca binnilídxibe ne gucuaacabe stale ndaaya'.

Guyúbinu ca perla ni ga'chi'

w04 1/1 yaza 29 párr. 7

Ca ni naquiiñe' gánnanu de libru sti' Génesis (primé ndaa)

7:2 ¿Xi yenándacabe para biénecabe guná' nga ca maní' «nayá» ne ca maní' «nabiidi'»? Para gunda gudíxhecabe guná' nga maní' nayá ne ni nabiidi' la? biiyacabe guná' nga ca maní' ni rudiicabe casi sacrificiu ora guni adorárcabe Dios ne cadi ni zanda gócabé o ni qué zanda

gócabé. Ante gueeda Diluvio, qué ró di' bin-ni xpeela mani'. Lu Ley sti' Moisés nga primé biaje biete ca diidxa' «nayá» ne «nabiidi'» ora can'i'ni de guendaró, peru ma' qué ña'ta' di' xii nga ni nayá ne ni nabiidi' dxi biluxe Ley que (Hechos 10:9-16; Efesios 2:15). Racá ridú'yanu, maca nanna Noé guná' nga ca mani' zanda gudii casi sacrificio para Jehová. Ne casi pe' biree Noé ndaani' arca que bicuí «ti altar para Jehová ne bidiibe caadxi de ca mani' nayá ne caadxi de ca mani' ni ripapa nayá casi ofrenda ni ricá guí» (Génesis 8:20).

w04 1/1 yaza 29 párr. 8

Ca ni naquiñe' gánnanu de libru sti' Génesis (primé ndaa)

7:11 ¿Paraa biree guibidxi nisa ni biaba lu guidubi Guidxilayú dxi guca Diluvio que? Lu guiropa período o guiropa «dxi» de cuzá' Dios cosa, dxi biza'be «espaciu» ni riénenu atmósfera sti' Guidxilayú, nuu «nisa xaguete' de espaciu» ne nuu «nisa lu espaciu» (Génesis 1:6, 7). Nisa ni nuu «xaguete'» nga ni maca nuu lu Guidxilayú. Nisa ni nuu «lu espaciu» ca la? laani nga guirá' nisa naca vapor ni nuu lu bi ne guirá' vapor ca nga guibidxi nisa ni biaba lu Guidxilayú ca dxi sti' Noé.

27 DE ENERO HASTA 2 DE FEBRERO

CA TESORO ZEEDA LU BIBLIA | GÉNESIS 9-11

«Guidubi guidxilayú guni' ti idioma si»

it-1 yaza 275

Babilonia guidxi ro'

Ximodo guca Babilonia guyuu dxiqué. Dxi bizulú guidxi Babilonia lu ca layú sti' Sinar laaca gucalá'dxicabe nucuícabe Torre sti' Babel (Gé 11: 2-9). Gucalá'dxicabe nucuícabe torre ne guidxi que para gusisaca binni laacabe ne cadí purti' nuucabe gusisácacabe lá Dios. Ca torre nasoo casi pirámide ni rábicabe zigurat ni bidxéla-cabe ndaani' guidxi Babilonia guyuu dxiqué ne

xcaadxi lugar de Mesopotamia, zándaca biquiñecabe caní para guni adorárcabe tuuxa cásica biquiñecabe primé torre que, gastí' naca xi forma ne modo guyá' caní. Ra bicueeza Jehová Dios laacabe de gucuícabe torre o templu que bihuinni b'ñicabe ni purti' nuucabe lu ti religión falsu. Diidxa' hebreu Babel raca significar «ni ruchenda», lu diidxa' sumerio lani (*Ka-dingir-ra*) ne lu diidxa' acadio (*Bab-ilu*) guiropa' ni raca significar «Puerta' sti' Dios». Nga runi, bichaa ca binni ni biaana ndaani' guidxi que lani para cadí guihuinni naca ni ti castigu sti' Dios, peru neca bichaacabe lani gúparuni ti significadu de religión.

w13 15/2 yaza 7, párr. 20

Ndi' nga herencia ni cudii Dios laanu

²⁰ Bi'ni' mandar Nemrod guidxi Babel ne xcaadxi guidxi guyuu gaxha de guiigu' Tigris ne Éufrates (Gén. 10:10). Zándaca laabe nga guni'be gaca guidxi Babel ne torre sti' lu iza 2269 ante de ca dxi sti' Jesús. Jiobá maca gudixhe ique guibani binni lu guidubi Guidxilayú, peru caní cucuí guidxi que guni'ca': «Gúninu ti guidxi ne ti torre ni chindá dede guibá', zacá zuuyacabe laanu casi binni ni jma risaca, ti cadí guireeche ndásenu lu guidubi guidxilayú». Peru qué nireendú ni gucúa íquecabe ñúnicabe purti' bichaa Jiobá stiidxa' ca binni ni cucuí torre que, ngue runi bireeche ndásecabe lu guidubi naca Guidxilayú (Gén. 11:1-4, 8, 9). Pa ni gucala'dxi' Binidxaba' nga nuzá' ti religión para ñuni adorar guirá' binni laa la? qué ñanda ñaca ni gudixhe íquebe ca. Bia' dxi huabani binni lu Guidxilayú huayuu tu huayuni adorar Jiobá ne ca dxi stinu ri' jma stale tu cayuni ni.

it-2 yaza 204 párr. 7

Idioma

Ra bichaa Dios ni jma napa poder idioma sti' ca binni cucuí torre que, bicueezabe ni gudi-xhe íqueca' gúnica'. Nga runi, ma' qué ñanda ñúnicabe dxiiña' que ne bi'ni' obligarni laacabe guireeche ndásecabe lu Guidxilayú.

Laaca bicueeza ni laacabe de gúnicabe cosa ni cadi jneza ne gucaalúcabe Dios, purti' ma' qué ñanda ñúnicabe dxiiña' juntú, qué zanda guchaagacabe ni nánnacabe ne stipa stícabe para ñúnicabe ni cá íquecabe para guisá-cacabe. Neca nánnacabe gúnicabe stale cosa, cadi Dios di' bisiidi' ni laacabe, sínuque stúbica-be biziidicabe (bichaaga ni né Ec 7:29; Dt 32:5). Nga runi, neca bichaa Dios idioma stícabe, ne bi'ni' dividir laacabe, gucané ni para cadi gúnicabe xiixa cosa ni zanda guniná laacabe (Gé 11: 5-9; bichaaga ni né Isa 8:9, 10). Guini' íquesi-nu ximodo nabánu yanna, cadi jneza riquiíñe' binni guendananna sti', racá rudi'nu cuenta pa qué nucueeza Dios laacabe de ñúnicabe torre que, ñúnicabe stale cosa ni ñuniná laacabe despué.

it-2 yaza 455

Guidxi (Naciones)

Cumu qué ñénesaa ca grupu de binni que la? cada grupu gupa cultura sti', arte, costum-bre, modo laaca' ne religión stica'; gadxé gadxé modo bi'ni' cada grupu ca cosa sti' (Le 18:3). Cumu ma' qué ñuu ca guidxi que gaxha de Dios, gúpaca' stale dios (Dt 12:30; 2Re 17:29, 33).

Guyúbinu ca perla ni ga'chi'

it-1 yaza 397 párr. 7

Cam

Zándaca Canaán nga bi'ni' cosa ni cadi jneza bizaaca ri', ne bixhózebe Cam qué ñuni corregir laabe. O zándaca bicaa Dios Noé guini' ti profecía ni ná zuni heredar Canaán xpia' feu bixhoze, ne laaca zándaca ma' rihuinni ni luguíabe. Guca cumplir parte de maldición que ora bi'ni' ganar ca israelita ni zeeda de Sem ca cananeu. Peru ca ni qué nunitilúcabe (casi ca gabaonita [Jos 9]) beeda gácaca' esclavu sti' Israel. Gudi'-di' si stale iza, guca cumplir chaahui' maldición que ora ca potencia mundial ni zá de Jafet, laaca ni nga Medo-Persia, Grecia ne Roma bi'ni' dominar ca ni zá de Canaán, xiiñi' Cam.

it-2 yaza 481

Nemrod

Ca primé guidxi bi'ni' mandar Nemrod nga Babel, Erec, Akkad ne Calné, nuucani lu layú sti' Sinar (Gé 10:10). Nga runi, zándaca laabe nga gudíxhebe chu' guidxi Babel ne bi'ni' dirigirbe ca dxiiña' sti' torre que. Laaca sicari' nga guni' ique ca judíu bizaaca ni. Josefo bicaa: «chaahuidugá guca [Nebrodes (Nemrod)] ti gobernante malu, bidiibe cuenta para ganda gusaana binni de guidxibi Dios la? [...] caquiíñe' guni dominarbe laaca'. Guni'be pa quixhe ique Dios gundaahua Guidxilayú sti biaje, zúnibe ti torre guizá' nasoo para cadi gundaahua nisa ni. Ne laaca guni'be zaca vengarbe de Dios pur biiti ca binnilídxibe. Guyuula'dxi' binni ni guni' Nebrodes [Nemrod] ne laaca guni' íqueca' nácaca' esclavu pa gúnica' ni ná Dios. Ne zaqué nga bizulú bicuícabe torre que [...] guizá' nagueenda gundísacabe ni (*Antigüedades Judías*, libro I, cap. IV, secc. 2, 3).